

## 分心

既然有 hiah chē 見證人親像雲 kā 咱包圍 teh，咱 tiòh 排除一切 ê 阻礙 kah 一直 kā 咱纏絆 ê 罪，堅忍跑走咱頭前 ê 路程。(《全民台語聖經》希伯來書 12:1)

歷史上 siōng 出名 ê 浸信會教徒之一是德懷特·穆迪(譯註:Dwight L. Moody，美國出名 ê 基督教布道家)。有一 pái 當穆迪 teh 教導希伯來書 12:1 ê 時，伊 kha 脊 phia<sup>n</sup> 揸 (phāi<sup>n</sup>) 一個大 koh 重，可能有 75 磅 ê 包裹來到講壇。包裹 ê 重量 hō 伊 ê 身軀彎曲，總是，伊開始講道。會眾每一個人真緊 tòh 開始擔心穆迪 kha 脊 phia<sup>n</sup> ê 大負擔。最後伊停落來，講：「你看，我 kha 脊 phia<sup>n</sup> 揸 chit-ê 大重擔，實在真 oh 得對 lín 講道。我 beh kā 它 thèh 落來，án-ne，我 chiah ē-tàng kā 我全部 ê 時間 kah 注意力 khng tī 上帝 ê 話語。」

然後伊 kā 包裹 thèh 落來，koh kā 它 phah 開。內底 m̄ 是啥物 pháin 看，á 是罪惡 ê 物件，只是食物、衫褲 kah 冊，其中一本是聖經。然後穆迪講：「我 beh 講 ê 重點是，甚至是你生活中 ê 好物件，若是你 siu<sup>n</sup> 過 kā 它高舉，它 tiòh 會阻擋你對基督徒生活 ê 完全承諾。」

一般來講，當咱 teh 列出會 hō 咱分心 ê tai-chi ê 時，咱第一個想 tiòh ê 是罪惡 ê 物件，這並 m̄ 是 m̄-tiòh; chit 段經文確實 kā 咱講，tiòh kā 罪 khng tī 邊 á。M̄-koh，照穆迪所講 ê，會 kā 咱分心 ê 物件並無任何限制；好 ê 物件 mā 會成做障礙。

若是咱想 beh 成做一個優秀 ê 老師，á 是傑出 ê 律師，á 是成功 ê seng-lí 人，á 是好農夫，á 是技工，á 是護士，這 lóng 是好 tai-chi，無啥物 m̄-tiòh。M̄-koh，若是咱 hō 咱對 hiah-ê tai-chi ê 野心來干擾咱對基督 ê 承諾，致使無活出耶穌 ê 言行，án-ne，野心 tòh 會成做會 kā 咱消耗 ê 負擔。

咱 tiòh 確信無任何物件會干擾咱對耶穌基督 ê 承諾！

**祈禱：**上帝 ah，感謝祢 ê 提醒 kah 聖經 ê 應允，尤其是 tī 今 á 日 in iáu-koh 是適用 tī 我；in chit-má iáu koh kah 兩千年前仝款活活！我求祢 kā 希伯來書 12:1 ê 教導嵌 (kham) 入我 ê 心 kah 腦，thang hō 我活出符合我 ê 救主—耶穌基督所 hō 我 ê 簡單誠命。我靠祂 ê 名祈禱。阿們。

(2004.07.25)